

«Perdita n'è nagut auter che transfurmaziun» (Seneca)


Flurin Spescha: In retroguard persunal spontan

DA GISULA TSCHARNER

Il plaid dal filosof antic Seneca, che perdita na saja nagut auter che transfurmaziun, tuna sco blutta ironia, el è in affrunt cunter il cordoli, ina schleppa en la fatscha da la consternaziun. El banalisescha il schoc.

A l'emprim'egliada. A la segunda egliada m'obligescha questa sentenza da tadar pli profundamain. Ella è vegnida endament a mai spontanamain e na vul betg anc ma bandunar. Ella ma sforza dad esser sincera, forsa er critica visavi mamezza. Quai sco collega e sco presidenta anteriura da l'USR.

Vesend, udind e legend en tut ils meds da massa da la mort da Flurin Spescha, ils ultims dis, sent jau gia primas sbrinzlas d'ina transfurmaziun futura: Il laud en in cuntin, la gloriola senza tachels sin il chau da noss autur. Mia dumonda: Avevan nus er la curascha da metter la cruna senza tachels sin il chau dal Flurin vi-



vent? Ussa ch'el è mort èsi simpel d'al curunar. «Was einer ist, was einer war, beim Scheiden wird es offenbar...», sco ch'ina poesia conuschenta cumenza.

Sin la curuna da Flurin devi ina massa tachels, en ils eglis da blers, ella balinava er savens sin la testa onuravla. Pertge? Perquai ch'i nun era adina simpel da collavurar cun el. Ils impuls da quest genius èn stads uschè fermes che nus e/u auters na savevan adina suandar cun medem fiu e medema flomma. Ubain, che nus auters scripturas e scripturs na cartevan la realisaziun da ses projects stravagants. In u l'auter sa sentiva magari er in pau en l'umbriva dal Flurin Spescha, il qual ha sviluppà mintgatant ina forza bunamain magica da persvader, u almain da far vesair ideas ch'el veseva. Flurin ha er empermalà intginas ed intgins. Sia persuasiun sincera è stà inqualgia pli ferma che las schinumnadas manieras. Flurin ha in pèr giadas disturbà l'andament da l'uniun, vegnind en l'ultim mument cun

projects genials davant la supranza. «Utopist», al hani numnà ina gia durant la radunanza generala.

Pertge scriv jau quai? Per rumper sia curuna? Na, curunas na ma plaschan insumma betg. Per mai eri adina cler che Flurin veseva bler pli lunsch en il futur dal rumantsch e da la cultura insumma che blers. El suffriva da szenaris ch'el veseva profeticamain. El ha giudì chaussas ch'jau n'avess betg gi la libertad da las giudair. Oz engraziel jau a Flurin per tut ils impuls, er per quels ch'èn stads malempernaivels, exagerads u «schrägs» (in plaid preferì da Flurin), sperond ch'els han semnà insatge curaschus e realisabel en il mund.

Transfurmaziuns? Flurin ans ha laschè enavos bler, da quai che glischa e da quai che morda. Che tut vegnia transfumà en fritgaivladad spiertala concreta, quai è oz, sut l'impressiun da la perdita, mes giavisch.